

近代詩鈔

五

近代詩集

近代詩鈔

徐子苓

子苓字西叔安徽合肥人口口口口舉人官教諭有敦
良吉齋詩存

石遺室詩話西叔先生以詩古文詞爲江忠烈曾文正
二公所賞識仁和譚仲修選其詩與同邑戴子瑞家麟
王伯垣尙辰所作爲合肥三家實則戴不如王王不如
徐徐於文尤勝於詩也

田氏園夜坐懷嘯公

滅燭聽鴻過數聲霄漢閒鑪香釀花氣窗月浸盆山好句斷中
續奇文愛處刪欲尋林道語多恐掩柴關

饑婦詞

粘糊嬉春風雌雄相對飛啄蟲不自食哺子桑樹枝桑枝青婀娜黃口日以肥同生堯舜世我獨非烝黎輿夫夜在門月瘦燈光低嬌兒故憨跳索乳懷中啼亦知就乖張且復相抱持抱持聲暗吞去去天一涯淫水屢降割誰道皇穹慈母在兒共死母去耶不饑牀頭絮敗襠架有青臂衣眠食順耶意冷暖毋嬌嬉地下卽黃泉見汝當有期毋爲苦相憶掩泣從此辭

中秋後十日夜書嘯和尚水災詩後

貂衣肉食何爲者荒山老僧淚盈把手持一編要我讀白日銜山繼以燭檐花熒熒燭花綠前篇水災詩後篇水災詩中篇棄婦鬻兒詞雲愁雷歎天爲悲僧也學佛斷頭髮禿頂童童盡成雪錦囊一串鮫人珠胸中磊塊眼中血桑門事鬼言多誣僧也獨與羣髡殊殺青試寫千萬本持問中朝賢士夫

盱山試玻璃泉贈韓俊民

金鼇百尺勢崢嶸雲影泉光結伴行我似雲飛無定所君如泉
水在山清依人轉覺他鄉好懷古誰知逝者情後之視今今視
昔不妨高處共題名

夜坐酬韓山人

風息空光定夜色在庭樹寒鐘將雁聲宛轉自來去山人念清
暉欸欸道中素新知豈不樂怛焉思親故

漕川薛氏樓夜坐二首

時要爲泗州許生書來
爲睦陵之行

高齋敞夜色屋角星可數蟲聲排戶來淒清共誰語征鴻飛且
鳴似說雲路苦故園秋海棠別來纔幾許零落塵土中誰人憐
惜汝

久客脫風沙頗樂青燈味河漢澹不收几案生秋氣大江噫餘

怒虛濤落檐際春色無端來燈頭一花膩俯仰惜徂年拂衣余
將逝

畫松歌送吳引之還巢湖

江北久無畫松手作者昔數留晉江盛名早時動海外晚年流
落偏佯狂日抱長松換米喫枯根敗鬣愁荒唐餘枝兼能寫風
雨到今尺素垂琳瑯昨見宋家兩株樹張在蘆簾最深處一樹
拔地生狻猊一樹盤攫蛟龍垂波濤颯沓涼風颺使我坐久看
移時晉江畫松得松骨此筆韻遠將過之廬陽城中一尺雪昨
夜吳生幾凍殺扁舟襍被意態雄歸帆笑指巢湖東便好相從
理釣篷四頂山前楓葉紅

餉軍瓶梅花歌懷韓山人

上銳下削長徑尺腹大耳敲色微黑多年老窖火氣退蓄水猶

能助花力此瓶得自韓山人山人贈我長淮濱
離亡姬列三戶盡劫灰屢換瓶獨存薦之檀牀
素馮几伴以玉滴癭木尊狂花膩葉入采擷
案頭留得吾家春敝帚自貴金自賤此瓶費
殺豪家羨一從我自徐州歸數年不見山人面
王家園裏好梅花拘來不問橫與斜空梁沈沈
月漸落每聞翠羽長咨嗟重簾昨被風吹透凍
裏一枝開更秀金鴨香溫更漏稀草堂門掩燈
如豆

翫遺芳軒曉起卽事

穉子折花至枝長花更馨小鬟汲金井引水注
銅瓶殘月白辭樹修篁青滿櫺道書行可把不
羨子雲亭

冬晚同子固飲酒

歲宴人事艱百貨日翔貴今宵一斗春君向誰
家貫城中十日雪流民凍俱斃卽此觴豆微了
卻數口費粵南早瘡痍江東又

烽燧假君席前箸請君畫大計勿謂肉食鄙建豎本不易油燈
凍虛壁朔風吼平地已矣復何言浩歌徑成醉

懷高隱居姥山

高生性谿刻清苦似桃椎逕自將妻去常聞數米炊觀巖忘反
駕徂歲繫相思便弄焦門棹拏舟一問之

早春

早春殘雪在春意靜中知鳥路紅將闢魚牀綠漸滋攤書欣日
煖枕石愛雲遲吟罷攀庭樹因之感別離

白衣菴哭問渠

燕臺飢魄慘風烟直下黃河浪拍天歸櫬無家依古佛寡妻抱
子設齋筵絕交久已聞劉峻故里馮誰葬董傳同是中郎門下
士新詩和淚寄重泉

楚澤樓懷古

魚行不見水馬行不見風大哉堯舜民不知岳牧功斯樓近千
載過者生敬恭朝廷樹耆舊百爾秉公忠前有范希文後有司
馬公至今湖堧民猶憶天章翁我來屬春仲四野何童童洪波
亞高壩蕭瑟人烟空世無神禹手誰挽萬壑東尙須慈靜吏坐
致桑麻豐

臘月廿四日遣鄭僕往周雲先家迎吳四引之二首

莫作貧家僕貧家僕最難可憐風雪緊短褐故單寒送汝出門
去梅花開正闌沿溪好攀折留供主人看

轉過青山脚塘梢帶遠村言尋吳道子試叩孝侯門晚飯紅豛
細匡牀稻草溫儻然訊近狀道我舌猶存

到京簡潘四舍人兼送什物

黃鵠翔九霄徘徊念其羣延平雙神劍會合通風雲而况吾黨
士齒宿意常新長安勢利交古道今不存愛君風領殊感君氣
誼敦奉貽不腆資聊以致懃懃皋城產名茶古味煙霞鄰與君
作午飲退食有餘芬光明萬字紗白地無邪紋與君作中衣健
茲梁棟身摺扇來南中製比蒲葵珍願君揚仁風利見當良辰
粉署接天語撰作須龍賓贈子以二妙外元中含醇願君濡大
筆吐氣摩乾坤典則歸一家藻采輝千春毋徒注蟲魚耗損壯
夫神柴車苦勞頓腰痛脛不伸部牒須急投灑掃還自親遙望
南橫街玉鏡磨新痕暇卽跨驢過讀君新著文

羅漢寺尋黃山人索畫不值因憇亡友嘯公精舍愴然有

作留簡山人

月轉禪扉老樹斜石幢薜蔔影交加一龕西竺高賢像數筆南

唐院本花淒切誰家鳴夜笛蒼茫隻履隔天涯懸知白髮逃禪
客醉倒城東賣酒家

後苦雨五首

錄一

東風雨不止北風雨不止信是南風惡將晴雨又駛嚮晨一婦
哭哀音答流水云有七歲兒願易數炊米于時有陳公貸錢歸
其子陳公者誰何屠酤細民耳
陳名順匹夫偶慕義仁風動鄉里
我歌不忍長恐增士夫恥

客春識戴君存莊於京師君爲方先生植之高弟冬孟余
赴九江道桐城因戴君得交方君存之蘇君厚子桐城
爲文章氣誼之地獨三士云乎哉而三君者則皆出於
方先生之門余孤蠢晚學流落江湖閒念先民之既徂
慨離羣之多故詩以代簡時仲冬下澣歸自皖江

桐城有三士北行得存莊受經考槃翁捫腹鏗琳瑯吐詞如太
阿神鋒無鈍芒渥洼多名駒梁水多巨魴磁石能引鍼匠門工
必良揚舲指江水問道龍眠陽傾蓋得佳士空谷幽蘭芳方君
旣秀出蘇子亦老蒼盧鄭本一師籍湜猶輩行國朝盛文運方
劉高激昂麻溪守義法力挽奔波狂古道日彫謝末俗須扶匡
匡廬碧無盡皖水孤帆長名山與勝友風雨交離腸械詞付黃
鵠爲我西南翔

早發鎮江

水宿無厚繇江聲寒到骨舟師夜中起解纜踏殘雪遠征歸興
翩孤吟酒思渴靜觀抱龍虎丹臺炯如月窮塗事多梗勞生及
瑣屑未窮北固勝頻欠中泠啜寂歷沙雁鳴寒鐘助淒咽

廬陽夜捷行贈江使君達川

使君爲中丞介弟中丞死於廬州之難戰守大略余別
有記頃者官軍收復郡城兩大帥加官晉爵於時使君
固請去而郡人士感銘前勞於城復之後六日相率麻
衣首經會祭中丞於郡之潛山廟中旣卒奠使君前謝
客相向而哭余郡人也今昔見聞之際有難言者因事
命篇卽贈

廬陽夜捷烈炬紅露布連奏甘泉宮使君兵聲冠諸將輕裘緩
帶殊雍容記昔曾在圍城中挾策兩謁中丞公中丞英偉人中
龍使君眉宇春融融指麾綽有中丞風牙旗深處展高宴橙香
螳綠霜螯健野人喜極悲倒來曉柝深杯淚如霰君不見荒城
蕩蕩跡如掃縱橫瓦礫居民少髑髏滿地生青草君不見壺漿
士女泣垂面愛說中丞舊時戰張巡死去賀蘭生痛殺潛山廟

中奠驃騎連宵拜新命漢廷不惜通侯印使君愛逐赤松游脊
令原畔牽歸興爲君高歌歌斷絕悲筳吹落林閒月

除夕前一日醉起呈江使君時使君以歲晏享士虛其左
西向以薦中丞之靈旣畢奠使君揖余就賓位曰君先
兄故人狀相若齒相埒也見君如見吾先兄矣余之識
中丞以陳池州池州之死久而未明而其弟畢凡千里
來尋兄骨又久而未至俛仰悲懷轟飲極醉不覺失聲
哭率成二首呈使君兼留遲畢凡

虎帳森嚴忝上賓座中靈爽動星辰無端慟哭干戎禁多媿將
軍怨酒人信國千秋青史在荆卿四座白衣新醉時錯認西臺
路朱鳥歌終倍愴神

老向風塵賦八哀池州儒雅濟時才並時巡遠宜同傳入洛機

雲久未來數載兵戈知己盡百年懷抱對君開天涯明夕同除
夕好挽長河注酒杯

會城歎贈汪果

君浙江嘉興人
工書

昔者君來時會城峙皖江今者君來時會城寄廬陽廬陽但空
城黃蒿過人長皖垣棄不收白日鳴豺狼我生幸再更畢逋山
谷藏與君別廿年音書隔車航昨勞走倅問溝瀆銜末光相逢
一驚喜仰視蒼天蒼憶昔全盛日軒車同頡頏于時值孟冬狐
裘君馬黃置酒臨江亭醉挹天柱光熙平富文物萬艘齊帆檣
節樓擁高戟曲巷羅仙倡南金謀善州北珠媚後房梁鴻方少
年潛行歌慨慷繁華一朝盡鐵馬荆榛荒賊王與賊帥笑踞中
丞堂沿門唄耶蘇拘囚到紅妝竊聞初陷時刳人如豬羊所嗟
萋宏血不到清水塘肥東穩行臺四閱冰與霜喪馬求林中殪

豁委道旁驃騎素貴通僚吏工趨蹌峨冠嵌珊瑚列燕惟金張
逢掖一老儒袖短衣郎當長揖公卿閒旁人笑疏狂蹶張諸健
兒誰解師鍾王君家好山水白首胡栖皇彈劍對尊酒月落悲
茫茫

移家自賀

自我居雙山荏苒六寒暑忘形到樵牧相過共雞黍世亂俗盡
偷壤瘠風尚古仄處不嫌陋愛茲衆峰嫵牆東有廢宅人棄我
獨取斂錢藉素交助力仗鄰圃經營始仲春移家居重午因倚
置講堂約略具環堵長物一木牀足斷背旁俛殘編出秦火斑
斕劫痕苦無扉暫安簾有竈足支釜籬隨山勢編竹待秋來補
乾坤正反仄中衢鬪豺虎擬備釣魚舟江淮路頻阻自號贅瘤
人暫作煙霞主清晨有客來晴光動巖戶懽然倒酒尊梁燕欣

對語舉酒酌飛燕我生殊羨汝秋去春復來汝身有毛羽

葛家觜飲酒卽事短述奉貽相公兼別山中舊游二首

葛家觜爲方山支麓咸豐四年余避兵家此八年秋廬
州再陷山中迭苦賊去年冬今相公以兩江總督進復
安慶余挈家出遊遂依焉今年余來山中瀕行隣人置
酒道別村曲語言猥雜無文要其述德戒行是可歌也
時同治元年秋九月廿三日夜

草棚馮長溪靄靄西日光老農閑遊子置酒瓜蔓旁鄰曲歡笑
言真氣溢壺漿老婦調魚羹老翁趣行觴酒闌說相公舉手屬
穹蒼自從相公來皇天屢降祥方春拔廬州旣夏甘霖翔猓豚
亦已肥鵝鴨皆成行信是相公力秋禾早登場君從皖江來相
門長趨踰相公本天人見說鬚髯長相公飯幾何頭髮應未蒼